



Paarma Lund Kreutzmann
Inatsisartunut ilaasortaq, Inuit Ataqatigiit

§ 37 naapertorlugu apeqqutip nr. 034/2026-p akineqarnera

Asasara Paarma,

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaaqka. Apeqqutit issuarneqartarput tamatumalu kingorna akineqarlutik.

Ulloq: 10-03-2026
Suliap normua: 2026 - 4143
Allagaatip normua: 26258644

Postboks 1160
Oqarasuaat: 34 50 00
Fax: 34 55 05
3900 Nuuk
Email: pn@naaq.gl
www.naalakkersuisut.gl

1. Kalaallit Nunatsinni illoqarfinni minnerusuni peqqissaaviit ualikkut nalunaaqutaq sisamat kingorna matuneqartarnerat illersorneqarsinnaava?

Akissut:

Peqqissaaviit napparsimmaviillu ualikkut sisamat kingorna matuneq ajorput, Peqqinnissaqarfilli peqqissaavinni ataasiakkaani sulisut aalajangersimasumik unnukkoortarunnaarlutik/unnuarsiortarunnaarlutik aggerasuaqquneqarnissamut sillimasarnissaannik aaqqissuusseqqinnikuusoq, Naalakkersuisut erseqqissaatigerusuppaat. Aaqqissuusseqqinneq illoqarfinni minnerni uninngasoqarpiarneq ajukkajuttuusuni atuuppoq. Sulisut aningaasartuuteqarfiunerunngikkaluamik ulluuneraniinnaq sulisarnissaat aaqqissuusseqqinnermi siunertaavoq. Tamanna peqqinnissaqarfimmik atuisunut iluaqutaasussamik peqqissaanermi sulisunik atorluaanerunissamut tunngavissiivoq. Sulisut aggerasuaqquneqarsinnaammata, aaqqissuusseqqinneq illersorneqarsinnaasutut Peqqinnissaqarfiup nalilerpaa.

Peqqinnissaqarfik ingerlatsinerneq aningaasaqarniarnermigut ukiuni kingullerni ilungersunangaatsiarpoq. Peqqinnissaqarfiup utoqqaat katsorsartariillit amerliartuinnarnerisa ilutigisaanik nunatsinni inuiaqatigiit agguataarnerisa equngaleralluinnarnerannik pissuteqartumik ukiuni aggersuni aningaasartuuteqarnerunissaa naatsorsuutigineqartariaqarpoq. Tamanna innuttaasunut iluaqutaasussamik aningaasanik sulisunillu ilinniarsimasunik sapinngisamik isumatusaarluinnartumik atorluaanissamik qulakkeerinninnissaq pisariaqarneruleraluttuinnarpoq.

Taamaammat nunatta inuisa, Peqqinnissaqarfik aningaasaqarniarnikkut aamma ilungersuagaluarpalluunniit, peqqissutsikkut kiffartuunneqarsinnaanissaat, Naalakkersuisut pingaartittorujussuaat. Taamaammat, ilaatigut peqqinnissamut illikartitanit, Peqqinnissaqarfimmik ukiuni kingullerni aningaasalersuinerit pisarput. Tamatuma saniatigut Peqqinnissaqarfik sipaarniuteqarnissaa kiffartuussinikinnerulernissaa pinngitsoortinniarlugit, Naalakkersuisut Peqqinnissaqarfiup 2025-mi sippuineranut matussusiipput.

Naleqquttumik pitsaannerusumillu katsorsaasoqartarnissaata nalinginnaasumillu paaqqinnittoqartarnissaata kommunit suleqatigalugit qulakkeerneqarnissaa, Naalakkersuisut aamma sulissutigaa.

Nunatsinni Peqqinnissaqarfimmit 23. septembari 2025-mi [naqqiut](#)¹ Naalakkersuisut tamatuma saniatigut innersuussutigaa. Peqqinnissaqarfik nuna tamakkerlugu innuttaasunit ulloq unnuarlu tamatigut attavigineqarsinnaasoq tassani allaqqavoq.

§ 37 naapertorlugu apeqqummut nr. 178/2025-mut akissut aamma § 37 naapertorlugu apeqqummut nr. 015/2026-mut akissut takukkit.

2. Illoqarfinni nakorsap ualikkut nalunaaqutaq sisamat kingorna pigaartuutinneqartannginnera illersorneqarsinnaava?

Akissut:

Illoqarfinni minnerni nakorsanik aalajangersimasumik unnukkoortoqassaarnera /unnuarsiortoqassaarnera suliatigut isumannaatsutut nalilerneqartoq, Peqqinnissaqarfiup Naalakkersuisunut ilisimatitsissutigaa. Nunatsinni Nakorsaaneqarfiup Peqqinnissaqarfiup immikkoortortaqaafiini pissutsit peqqinnissamut tunngassutilimmik suliaqarfiusut tamaasa, tamatumunnga ilanngullugit katsorsaaneq nalinginnaasumillu paaqqinnineq il.il., pissusissamisoornersut nakkutigisarpai, tak. [Nunatsinni Nakorsaaneqarfiup sulinera pillugu Namminersorlutik Oqartussat nalunaarutaat](#)².

3. Peqqissaaviup ualikkut sisamap kingorna tassanngaannaq pisoqartillugu atornerqarsinnaannginnera illersorneqarsinnaava? Tassanngaannaq pisut tassaasinnaapput uummammik unittoorneq, iluaallerneq, annertunerusumik napineq, aanaarujussuarneq il.il. minutsit tamarmik pisariaqarneranni.

Akissut:

Apeqqut 1-imut 2-mullu akissutit takukkit.

4. Tassanngaannaq pinartoqarnerani nakorsamik oqarasuaatikkut oqaloqatiginninnerup naatsorsuutigineqarnera illersorneqarsinnaava?

Akissut:

Apeqqut 1-imut 2-mullu akissutit takukkit.


5. Peqqissaasut peqqissaanermiluunniit sulisut allat akuersissutiminnik annaasaqarsinnaanerminnut aarlerisariaqarpat, nakorsap suliassaanik suliaqartariaqarsimassagunik, ilinniakkatigut piginnaasatik qaangerlugit?

¹ https://naalakkersuisut.gl/Nyheder/2025/09/2309_Berigtigelse?sc_lang=kl-GL

² https://nalunaarutit.gl/groenlandsk-lovgivning/2017/bkg-07-2017?sc_lang=kl-GL

Akissut:

Passussinertalimmik nakorsaaqquneqarneq inatsimmi tamatumunnga tunngasumi aamma [Nunatta Nakorsaaneqarfiata peqqinnissakkut sullissinermik suliaassiussineq pillugu ilitsersuutaani malittarisaliuunneqarnikuuvog](https://nun.gl/-/media/landslaegeembedet/sundhedsprofessionelle/landslaegens-vejledninger-for-sundhedsprofessionelle/delegation/vejledning-om-delegation---gl.pdf)³. Illersorneqarsinnaappat qanoq iliornissamik ilitsersuinikkut, taamaaliorsinnaanermik uppersarsaanikkut nakkutilliinikkullu, passussinertalimmik nakorsaaqqusisoqarsinnaavoq. Nakorsaq pisuni taamaattuni akisussaasuusarpoq, ikiortasullu piginnaasaqarfigisaminik taamaallaat suliaqaqqusaallutik. Nakorsap akisussaaffigisai allanut suliaassiussutigineqarsinnaanngillat, soorlu nakorsap allagarsiussassaanik suliarinninneq, toqusoqarneranik uppersarsaatiliorneq, siniinnalertoqarneranik nalunaaruteqarneq tarnikkullu nappaatilinnut immikkoortortamut pinngitsaaliissummik unitsitanut tunngasuni aalajangiineq. Peqqissaasoq maleruagassat naapertorlugit passussinertalimmik nakorsaaqquneqarsimatillugu peqqissaasutut sulisinnaanermut piginnaatitaajunnaarneqarsinnaanngilaq. Tamannali aatsaat pisinnaavoq, peqquneqanngikkaluarluni, maleruagassanik unioqqutitsilluni illersorneqarsinnaanngitsumilluunniit passussinertalimmik nakorsaasimappat. Sakkortuumik arlaleriarluniluunniit unioqqutitsisoqarsimatillugu, Nunatta Nakorsaaneqarfia mianersoqqussuteqarsinnaavoq sukannersumillu nakkutilleeqqusisinnaavoq, sakkortulluinnartumillu unioqqutitsisoqarsimatillugu peqqissaasutut sulisinnaanermut piginnaatitaanermik killiliisinnaavoq arsaarinnissinnaalluniluunniit. Taamaaliortinnanili nakorsamit taama suliaqaqqusisoqarsimanersoq, taamaaliornissaq akuerineqarsimasoq suliaassiussutigineqartumillu illersorneqarsinnaasumik naammassinnittoqarsimanersoq nalilerneqaqqaartussaavoq. Nalornissuteqaraani Nakorsaaneqarfik attavigineqarsinnaavoq siunnersuillunilu ilitsersuisinnaavoq.



Inuulluaqqusillunga

Anna Wangenheim

³ <https://nun.gl/-/media/landslaegeembedet/sundhedsprofessionelle/landslaegens-vejledninger-for-sundhedsprofessionelle/delegation/vejledning-om-delegation---gl.pdf>